

Ո Ր Ո Շ ՈՒ Մ N 67
Վարչական վարույթը կարճելու մասին

«23» փետրվարի 2023թ

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետ Արտաշես Ղամբարյանս, քննելով Իրանի՝ Իսլամական Հանրապետության քաղաքացի Ալի Յուսեֆի Մոհեբի (անձնագիր՝ T54572106) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց Ի

Թիվ 05100041/060722/0000706183 մաքսային մուտքի օրդերով ՀՀ է ներմուծվել HYUSUNG AQUILA մակնիշի, 2015 թվականի արտադրության, N3C***249H9400060 նույնականացման համարով, 1290-10 պետհամարանիշի տրանսպորտային միջոցը, որը սահմանված ժամկետում՝ մինչև 06.02.2023 թվականը չի վերաարտահանվել ՀՀ-ից:

Նշված փաստի առթիվ Իրանի Իսլամական Հանրապետության քաղաքացի Ալի Յուսեֆի Մոհեբի նկատմամբ Հայաստանի Հանրապետության պետական եկամուտների կոմիտեի Հարավային մաքսատուն-վարչության ավագ մաքսային տեսուչ-իրավաբանի կողմից 17.02.2023 թվականին հարուցվել է մաքսային կանոնների խախտման վերաբերյալ վարույթ՝ «Մաքսային կարգավորման մասին» ՀՀ օրենքի 309-րդ հոդվածի հատկանիշներով, այն է՝ «Ֆիզիկական անձանց կողմից հետագա արտահանման պարտավորությամբ Հայաստանի Հանրապետություն ներմուծված անձնական օգտագործման տրանսպորտային միջոցները սահմանված ժամկետում Հայաստանի Հանրապետությունից չարտահանելը, եթե հետագա արտահանման պարտավորությունը խախտվել է ավելի քան տասն օրով՝ առաջացնում է տուգանք՝ ֆիզիկական անձանց կողմից այդ տրանսպորտային միջոցներն ազատ շրջանառության համար բաց թողնելու նպատակով ներմուծելու համար նախատեսված մաքսային վճարների (բացառությամբ մաքսային մարմինների կողմից մաքսային գործառնությունների իրականացման համար գանձվող պետական տուրքի) մեծության տասը տոկոսի չափով, բայց ոչ պակաս, քան երեսուն հազար դրամի չափով»:

«Մաքսային կարգավորման մասին» ՀՀ օրենքի 301-րդ հոդվածի համաձայն՝ «մաքսային կանոնների խախտում է համարվում անձի կատարած անօրինական

գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության»:

Վարչական վարույթի շրջանակներում հարցում է կատարվել ՀՀ ՊԵԿ Ներքին անվտանգության վարչությանը՝ ԻԻՀ քաղաքացի Ալի Յուսեֆի Մոհեբի սահմանահատումների պատմությունը ստանալու նպատակով:

Ներքին անվտանգության վարչությունից ստացված տեղեկատվության համաձայն՝ ԻԻՀ քաղաքացի Ալի Յուսեֆի Մոհեբը 09.07.2022 թվականին ժամը 23:03-ին Բագրատաշեն պետական սահմանի անցման կետով HYUSUNG AQUILA մակնիշի, 2015 թվականի արտադրության, N3C***249H9400060 նույնականացման համարով, 1290-10 պետհամարանիշի տրանսպորտային միջոցով անցել է Վրաստան:

«Վարչարարության հիմունքների և վարչական վարույթի մասին» ՀՀ օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

Նույն օրենքի 42-րդ հոդվածի 1-ին մասի համաձայն՝ վարչական մարմինը վարչական վարույթում որպես ապացույց գնահատում է գործում առկա բացատրությունները, ցուցմունքները, փորձագիտական եզրակացությունները, փաստաթղթերը, նյութերը, իրերը, ինչպես նաև այն հանգամանքները, որոնք իր հայեցողությամբ այդ մարմինը պիտանի և անհրաժեշտ է համարում գործի փաստական հանգամանքների բացահայտման և գնահատման համար:

«Վարչական իրավախախտումների վերաբերյալ» ՀՀ օրենսգրքի 247-րդ հոդվածի համաձայն՝ Վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝ 1) վարչական իրավախախտման դեպքի կամ կազմի բացակայությունը(...):

«Վարչական իրավախախտումների վերաբերյալ» ՀՀ օրենսգրքի 279-րդ հոդվածի համաձայն՝ վարչական իրավախախտման վերաբերյալ գործը քննելիս մարմինը (պաշտոնատար անձը) պարտավոր է պարզել՝ կատարվել է արդյոք վարչական իրավախախտում, արդյոք, տվյալ անձը մեղավոր է այն կատարելու մեջ, արդյոք նա ենթակա է վարչական պատասխանատվության:

Վերոշարադրյալ նորմերի համադրված վերլուծությունից ակնհայտ է, որ օրենսդիրը, «Վարչական իրավախախտումների վերաբերյալ» ՀՀ օրենսգրքի ընդհանուր մասում սահմանելով վարչական իրավախախտման, այն կատարելու համար նախատեսված վարչական պատասխանատվության, վարչական տույժի և դրա նպատակների հասկացությունները, ինչպես նաև տույժ նշանակելու ընդհանուր կանոնները, որպես վարչական պատասխանատվության ընդհանուր սկզբունքներ ամրագրել է «անձնական պատասխանատվության» և «պատասխանատվությունը մեղքի համար» սկզբունքները: Նշված սկզբունքների էության շուրջ իր դիրքորոշումն է հայտնել նաև ՀՀ Սահմանադրական դատարանն իր 2014 թվականի հունիսի 3-ի թիվ ՍԴՈ-1153 որոշման մեջ հետևյալ հիմնավորումներով. «Վարչական իրավախախտումների վերաբերյալ ՀՀ օրենսգրքի 9, 32 և 279 հոդվածների համադրված ուսումնասիրությունը վկայում է, որ վարչական պատասխանատվության սկզբունքներից է «պատասխանատվությունը մեղքի համար» սկզբունքը, ինչը նշանակում է, որ վարչական տույժը (պատասխանատվությունը) կարող է կիրառվել միայն վարչական իրավախախտում կատարելու մեջ մեղավոր անձի նկատմամբ:

Հետևաբար՝ մեղքը, որպես վարչական զանցակազմի սուբյեկտիվ կողմի պարտադիր տարր, հանդիսանում է վարչական պատասխանատվության իրավական միակ նախապայմանն ու նախադրյալը:

Վերոգրյալից պարզ է դառնում, որ HYUSUNG AQUILA մակնիշի, 2015 թվականի արտադրության, N3C***249H9400060 նույնականացման համարով, 1290-10 պետհամարանիշի տրանսպորտային միջոցը սահմանված ժամկետում փաստացի արտահանվել է ՀՀ տարածքից:

Այսպիսով, վարչական վարույթի նյութերով հիմնավորվում է, որ Իրանի Իսլամական Հանրապետության քաղաքացի Ալի Յուսեֆի Մոհեբի գործողություններում բացակայում է իրավախախտման դեպքը:

Վարչական մարմինը գնահատելով գործում եղած բոլոր ապացույցները, բազմակողմանի և օբյեկտիվ հետազոտման վրա հիմնված ներքին համոզմամբ գտնում է, որ սույն վարչական գործով բացակայում է քաղաքացի Ալի Յուսեֆի Մոհեբի մեղքը և վարչական վարույթը ենթակա է կարճման:

Ելնելով վերոգրյալից և ղեկավարվելով «Վարչական իրավախախտումների վերաբերյալ» ՀՀ օրենսգրքի 247-րդ հոդվածի 1-ին մասով և «Մաքսային կարգավորման մասին» ՀՀ օրենքի 334-րդ հոդվածի 1-ին կետի 2-րդ կետով՝

Ո Ր Ո Շ Ե Ց Ի

1. Իրանի Իսլամական Հանրապետության քաղաքացի Ալի Յուսեֆի Մոհեբի նկատմամբ «Մաքսային կարգավորման մասին» ՀՀ օրենքի 309-րդ հոդվածով սահմանված մաքսային կանոնների խախտում կատարելու համար հարուցված վարչական վարույթը կարճել:

2. Որոշման մասին հայտնել քաղաքացի Ալի Յուսեֆի Մոհեբին:

ՀԱՐԱՎԱՅԻՆ ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ
ՄԾ ԳՆԴԱՊԵՏ

ԱՐՏԱՇԵՍ ՂԱՄԲԱՐՅԱՆ

